



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

COVID-19 mechi Malaysia nung state of emergency sangdonga lir

TAPAK 7

“Dynastic politics” raktoktsüla: PM Modi



VOL. XVIII NO. 89 (ADOK 89) DIMAPUR

RASEMNÜ (WEDNESDAY) AENJETI (JANUARY) 13, 2021

₹ 5.00

COVID-19 Nagaland: Nisung 12,000 teraagi majung

Kohima, January 12 (TYO): Mongulbarnü Nagaland nung nisung 10 dak COVID-19 aliba putetogo aser nisung 12 taneptsü angu, ta Health & Family Welfare Minister, S Pangnyu Phom-i ashi.

Tanü putetertem züngsema Nagaland nung nisung ajak agi 11,997 kümogo.

"Tanü nisung 10 dak COVID-19 aliba putetogo. Parnokji Dimapur nung 6, Kohima aser Mokokchung nung anana (2) lir. Maneni, nisung 12 taneptsü angu. Parnokji Dimapur nungi 6, Kohima nungi 5 aser Kiphire nungi 1 lir" ta Minister Pangnyu-isa ashi.

Nisung 11,997 rongnungi 11,667 taneptsü nguogo, ta paisa shisem.

"Nagaland nung COVID-19 puteta alir nisung 85 asü. Tasürtem rongnung nisung 74 coronavirus ajanga aser 10 tanga timtem ajanga asü. Nisung ka asüba kuli bushitepdar. Ano, nisung 140 tashi tanga state temi ogo" ta Dr Denis Hangsing-ia metetdaksü.

District balala nung COVID-19 putetba: Dimapur (6,443) Kohima (3,730), Mon (604), Peren (504), Tuensang (244), Mokokchung (184), Zunheboto (142), Phek (47),

Kiphire (41), Wokha (39) aser Longleng (19).

Nisung 11,997 rongnung Traced Contacts 4,921, armed forces personnel 4,659, tanga state tem nungi arur 1,846 aser Frontline Workers 571 lir, ta Minister Pangnyu-isa ashi.

District balala nung anepalurtem: Dimapur (64), Kohima (30), Mokokchung (7), Peren (2), Mon (1) aser Longleng (1).

"Tang anepalurtem rongnung nisung 16 dak shirangba yimya terara lir, ka kanga shiranga oxygen agidar aser 2 ventilators nung lir. Nisung 86 dakbo shirangba yimya mali" ta paisa ashi.

Taneptsü angurtem: Dimapur (6,249), Kohima (3,643), Mon (592), Peren (499), Tuensang (243), Zunheboto (139), Mokokchung (168), Phek (50), Kiphire (40), Wokha (35) aser Longleng (9).

"Nagaland nung COVID-19 alitsü akok ta temolung melemi bilemba sample 1,22,223 tendangogo. RT-PCR ajanga sample 72,715, TrueNat ajanga sample 36,879 aser Rapid Antigen Test ajanga sample 12,629 tendang" ta Dr Hangsing-ia ashi.

Dimapur nung ATM services shitak agütsütsüla: DNSU

Dimapur, January 12 (TYO): Dimapur Naga Students' Union (DNSU)-i Dimapur nung bank tem dang ATM Services shitak agütsütsü metetdaksüogo.

Dimapur aser temeket nung ATM booths indang osangtem DNSU tsüngdang benokba sülen bushitepa aodang ATM booths timba ka mapa meinyakba aser sen maliba ngutetogo.

DNSU-isa ATM booth kar nungbo nisung 20-30 dak tema noktaktepba nguogo, ta Media Cell, DNSU-i sangdong ka nung ashi.

ATM service majungba ajanga nübortem, talisa kaketshirtemi timtem ajurur. Bank temi customer dang ATM service charges agir anungji service shitak agütsütsüla, ta DNSU-i ashi.

ATM kar nungbo sorkari nisung o nisung tepila ayutsü latettsüba SOP sülen manidaker. Talisa, bank temi SOPs latetja aliba ama ATMs aika nung inyakim mali. Anungji, item onük ajak nung ajemdaker Bank ajak dang nübor nem ATM Services shitak agütsütsü mepishir, ta DNSU-isa metetdaksüogo.

BPCC(A-N) Tir tasen shimogo

Nakachari, January 12 (TYO): Arrtsülen alirtemi timtem ajuruba reprangshimsü atema Border Peace Coordination Committee (Assam-Nagaland)-i taoba tir asür B.P. Bora'er kidang senden ka menogo.

Asür B.P. Bora'er ki ya Jorhat district kübok Darikial Gaon, Nakachari nung lir.

Jorhat district kübok Nagajanka Tea Estate aser Mokokchung district kübok Ao senden village nung mangatettep kar adokba ajanga Assam NGO temi Mariani-Mokokchung NH702D anogo 22 mokdangba indang onük tanü senden nung benoka lemsatet.

Iba mapang senden nung adenertemi mangatettepji arrtsülen alirtemi masü saka tebilemba tamajung abener nisung kari adokdaksüba liasü ta ashi.

Arrtsülen alirtemi iba amala mapa tamajung inyakertem noktangsü atema kanga kümdanga alitsüla ta senden nung adenertemi metetdaksü.

BPCC(A-N) tir teinyakdak nung April 17, 2019 nü B.P. Bora asüba

sülen BPCC(A-N) nung Working President inyaksü atema Jiten Buragohain shima liasü aser tanü senden nung pa President inyaksü mulunga shimogo.

BPCC(A-N)-i Saringyim village nungi züngsem ka aginüa liasü aser village council-i ashiba nung ajemdaker Nagaland tsütsü nungi Executive Member inyaksü atema Rongsenjungba Imchen shim.

Maneni, Vice President, BPCC(A-N) inyaksü atema tang teinyakdak Executive Member O. Sangpang Longchar shimogo aser iba osang Saringyim Village Council dangi abentsü lemtet.

Senden nung Coordinator BPCC(A-N) menden liasü, Assam Valley Baptist Mission Evangelist, Huni Gogoi-i temoatsü meshia sarasadem, Vice President, BPCC(A-N) Imsu Jamir-i okila jembia aser President Jiten Buragohain-i anküp tepela o jembia liasü.

Jiten Buragohain-i züngsem ajak dang 'Nü Kidanger meimang' ta asüba BPCC(A-N) omen nung ajemdaker inyaksü ayongzük.

COVID-19 vaccine atema State Task Force (STF) senden amen



Covid-19 vaccine agütsütsü atema State Task Force (STF) senden tanabuba amenba noksa nung angur.

Dimapur, January 12 (TYO): Nagaland nung Covid-19 vaccine agütsütsü atema State Task Force (STF) senden tanabuba menogo.

January 12, 2021 nü sendenji Principal Secretary, Health & Family Welfare, Amardeep Singh Bhatia menden ser amen.

"January 16, 2021 nungi Nagaland nung COVID-19 vaccine agütsütsü aser iba atema sentong ajak renemogo. State nung shilem lemsar vaccine agütsütsü anungji bangdak department temi shilem agitsü ayongzük" ta STF Chairman, Amardeep-i ashi,

COVID vaccine ana shimdanga mamshitsü: Centre

New Delhi, January 12 (Agencies): Honibarnü nungi India nung healthcare aser frontline workers nem Covid-19 vaccine agütsütsü aser iba nung vaccine ana shimdanga mamshitsü ta union health ministry-i metetdaksüogo.

Centre sorkari vaccine ana-Covishield aser Covaxin amshitsü molunga agizükogo.

Vaccine dose anaji anogo 28 lir agütsütsü aser vaccine dose tanabuba agütsüba sülen anogo 14

kümezüka ayutsü ta health ministry, ICMR aser Niti Aayog külemi osangbener senden ka nung ashi.

Vaccine angutsüpurtemi vaccine angutsü anogo ka jelia osang angutsü. CO-Win app nung vaccination drive atema nisung crore 1 shi tenüng agütsüogo, ta ketdangsertemisa metetdaksü.

Centre-i Hombarnü Serum Institute of India (SII) dang 1.1 crore doses aser Bharat Biotech dang 55 lakh doses meshiogo.

Aluyimertemi Supreme Court luden magizük

New Delhi, January 12 (Agencies): Supreme Court-i ashishitep aketba farm laws asem sota ayuba aser mongin nisungtem dena luden ka shimba sülen ghonda ishika lir aluyimertemi luden shimba magizük ta metetdaksüogo.

Tanü nikongdang aluyimer All India Kisan Sangharsh Coordination Committee (AIKSCC)-i luden tasen magizük kechiyong iba nung züngsemtemji Centre-i yangluba ozüng pusemertem dena lir ta ashi.

"Onoki iba luden magizük, iba luden nung züngsema alir ajaki sorkar pusemer aser ozüng metentsür. Onoki linük ajungdang lungkak aitiba ulushitsü" ta Punjab nung aluyimer teloktemi metetdaksüogo.

"Sorkari Supreme Court ajanga iba luden bener arur ama bilemer" ta Bhartiya Kisan Union (R) tanishir Balbir Singh Rajewal-i ashi.

SC ajanga tentetba luden nung Bharatiya Kisan Union nungi Bhupinder Singh Mann, Shetkari Sanghatana nungi Anil Ghanwat, Dr Pramod Kumar Joshi aser agricultural economist Ashok Gulati

nunger shimoka lir.

Supreme Court-isa luden dang ita ana tsüngda parnok tebilemba agütsütsü atema mapang latettsüogo.

Luden nung züngsemtem melen yonga onoki iba luden den olemtep malitsü ta paisa ashi.

"Farm law asem mapa kuma meinyaki atatsü tuyuba atema pelar. Kanga junga lemtetogo saka iba ya onok indang temeten liasü aser Farm laws meyipa magi tashi onoki anema noktaksü" ta aluyimertemi ashi.

Supreme Court-i lungkak aitiba tesemtem nungi taintem aser tetsürtem anientsü atema ashi saka Rajewal-i ashiba agi "Taintemi lungkak aitiba tesem toktsür mounür. Ozüngtem meyipa magi tashi nisung shinga maotsü."

January 26 nü Republic Day amongdang Delhi nung onoki lungkak aittsü sentong renema aliba ama agitsü ta aluyimertemi ashi.

Aluyimertemi Republic Day parade nung timtem agütsüra, ibaji linük atema maaksü asütsü ta

sorkari tebilemtsü abenba shiogo.

"January 26 sentong tiptema dang agitsü. Nisung kari onok Red Fort mesüra Parliament-i aotsü ta olulu prokshir. January 15 sülen ang onoki koma shilem agitsü'ar telemtetba agitsü. Onoki kodang ozüng alema meinyaksü aser iba inyakim magizüksü" ta aluyimer teloktemisa metetdaksüogo.

Aluyimer telok 40 shi jungnüa lokteper tentetba Samyukt Kisan Morcha-i January 26 nü tractor bener Delhi-i aotsü aser official parade sülen "farmers' Republic Day parade" agitsü ta amokmerena metetdaksüogo.

Centre aser aluyimer teloktem taruba Hokolbar ajurutepa senden amentsü terenemba lir.

Aluyimertemi Centre dang Farmers (Empowerment & Protection) Agreement of Price Assurance & Farm Services Act 2020, Farmers Produce Trade & Commerce (Promotion & Facilitation) Act aser Amendment to Essential Commodities Act agentsü takhangba agütsü.

Supreme Court-i Nagaland Lokayukta dang mapa toktsütsü ashi

New Delhi, January 12 (Agencies): Supreme Court-i Nagaland Lokayukta Uma Nath Singh dang mapa nungi anentsü tetuyuba agütsüogo.

Chief Justice of India (CJI) SA Bobde-i aniba bench kati Hombarnü Nagaland Lokayukta atema okatsür dang pai inyaka aruba mapatem tenüng memenüki mapa nungi anentsü atema ashi.

"Mapa inyaka aotsü atema akhüm mali, anungji kechiba yamai pa anema ashishitep ken o tem adoka mapa inyaksü?" ta SC-i Uma Nath

Singh atema okatsür Vikas Singh dang asüngdang.

Nagaland sorkari SC dang Lokayukta nungi tashi ajak agentsü atema temepishiba ken o ka benokba angadangdang iba ya ashi.

Nagaland Lokayukta-i tim masüba mapa inyaker aser pa nija atema teyari aika meshir. Nagaland chief secretary-i memolungaka, pai Delhi nungi online ajanga dang inyaker ta state sorkari ken o benokba nung shia lir.

Covid-19 wara adokba ajanga

Uma Nath Singh-i Delhi nungi dang inyaksüsa aküm ta okatsür Vikas Singh-i ashi. Ajisiüaka, SC bench-i ibaji magizük.

"Onoki iba kuliji magizük" ta SC bench-i ashi. Iba bench nung CJI SA Bobde den

justice AS Bopanna aser justice V Ramasubramanian na dena lir.

Yashi SC bench-i Nagaland Lokayukta nem mapa toktsütsü ashiba molunga agizüksü bilemdangtsü atema hopta ka mapang agütsü.

Tuensang nung Puanglum cum mini Hornbill benjong amung



Loyem Memorial Ground, Tuensang nung January 12, 2021 nü Puanglum Cum Mini Hornbill festival 2021 amungdang Fest Patron, Kumar Ramnikant IAS, Deputy Commissioner, Tuensang Happung (Traditional Karting) nung mener aoba noksa nung angur.

Dimapur, Aenjeti/January 12 (TYO): Loyem Memorial Ground, Tuensang nung Chang Khulei Setshang (Chang Tribal Council) ajanga ayongba Puanglum Cum Mini Hornbill festival 2021 mungogo.

Iba benjongmung nung Kumar Ramnikant IAS, Deputy Commissioner, Tuensang ya Fest Patron liasü aser Khiamniungan Tribal Council tir M. Thangou ya Tribal Guest ama arua aden.

"Qui Qui" ta asüba omen nung ajemdaker iba benjongmung yimiyim ya S. Chingmak 2nd GB P/ Khel, Tuensang Village ajanga ayima liasü.

Iba sentong nung jembiba mapang Deputy Commissioner, Tuensang, Kumar Ramnikant-i ashiba agi, benjong ya kidanger aser kasa kin telungzük nung adianu ama kati ka meimteptsü atema maongka tajung lir.

"Tuensang District ya tetsü ka ama lir, aser iba district nungi danga district tem mesemteta ao, anungji maparen ajak nung lenir ka ama tangatetba tajung

nung inyaktsüla. Benjong amungba mapang tatok agütsüba aser amadokba ya omen südaktsütsüla," ta pai ashi.

Khiamniungan Tribal Council tir, M. Thangou-i Tribal Guest ka ama mapang tatsüka agia jembiba mapang, alipokdang nungi Chang aser Khiamniungan ya adianu ama lia aru ta ashi aser lanurtem dang temesepba chiyongtsütem nungi pila alitsü aser terenlok aliba lokti ka asütsü atema meranga inyaktsü ajungshia liasü.

Tuensang SP, Bharat Lakshman Markad IPS ajanga nüburtem dang azümesena malitsü aser bendanga agütsür mapa ajak meima inyaktsü ajungshia liasü.

Chang Khulei Setshang tir, Nungsang Lemba-ia lokti dang, pei yimya nung dangar nem tatok agütsüba alitsüla, kidanger den tesunep aser amaliep nung alitsüla, aji asünung dang district ya renloktsü, ta ayongzük.

Iba sentong nung tarur pela agizükba o ya P. Ngamen,

Convenor, Planning Committee ajanga jembi. Chang Khulei Setshang ajanga mezüngbuba Chang Puanglum Qui Qui award ya Nagaland Chief Minister, Neiphiu Rio nem agüja liasü. Rio dak Hornbill benjongmung ajanga Naga nung sobalibaliru ajungkettsü nükla aliba aser Naga nung benjong alima ajungai meteta kumdaktsüba temaitsü iba sempet ya agüja liasü.

Kumar Ramnikant IAS ajanga nüburtem tajungtiba nung tenzükba aser district nung COVID-19 tashidak prokshia aoba azüoktsü atema molungsoa inyakba atema pa nema Chang Khulei Setshang ajanga Qui Qui sempet agüja liasü.

Noklak ya district kumdaktsüba aser Khiamniungan kin mangdang ataloktsüba atema Khiamniungan Tribal Council nema iba sempet ya agüja liasü.

Planning Committee Puanglum ajangasa Qui Qui sempet ya Chang Khulei Setshang nema agüja liasü.

Assam Rifles temi GPS Thongsoneyu nem teyari agütsü



Dimapur, Aenjeti/January 12 (TYO): HQ IGAR (N) kübok Kiphire Battalion indang Assam Rifles temi Noklak district kübok Thongsoneyu yimtsüng nung aliba Government Primary School ka nem January 11, 2021 nü teyari agüja liasü.

Parnoki iba project nung shilem ka ama school nung aliba

class takdang pezü nung LED tubelight inoktsü, PVC switch boards, MCB tem amshia wiring otsü, süng agi yangluba menden 16, Blackboard pezü, tesayur atema plastic chair pongu agüja liasü.

Maneni Assam Rifles temisa iba school nem Football ana, Volleyball ana aser Cricket sent ana agüja liasü.

Item osettsüset ya Thongsoneyu yimtsüng indang Head GB, Khungkiu-i sayatsü, aser iba sentong nung Assam Rifles aser putu menden nung züngsemtem dena liasü.

Assam Rifles ajanga iba ama teyari balala agütsüba atema yimdaklir aser putu menden ajanga pelaba lemsatapa liasü.

Principal Accountant General (A&E) website melenogo

Dimapur, Aenjeti/January 12 (TYO): Principal Accountant General (A&E) Nagaland, Kohima office indang website link <https://agaenagaland@cag.gov.in> nungi <https://cag.gov.in/ae/nagaland/en> dangi melenogo, ta

sangdong ka ajanga metetdaksü. Anungji Principal Accountant General (A&E) Nagaland, Kohima website amshinertemi agüja aliba link nungi lapoka amshitetsü, ta sangdong ajangasa ashi.

Kohima DPDB senden January 15 nü amentsü

Dimapur, Aenjeti/January 12 (TYO): Kohima District Planning & Development Board (DPDB) pur ita shia amenba mezüng senden ya January 15, 2021 anepdang 10:00 ako nungi tenzuka DPDB indang Conference Hall nung amentsü, ta sangdong ka ajanga ashi.

Iba senden nung Kohima DPDB züngsem ajak medema arua adentsü metetdaksüogo. Züngsemtem nungi onük kar benoktsü lira, senden amenba anogo matongdang Secretary DPDB nem agütsütsüla, ta sangdong ajangasa ashi.

Photo Electoral Roll atema Kohima nung senden amentsü

Dimapur, Aenjeti/January 12 (TYO): Special Summary Revision nung aliba ama Photo Electoral Roll indang final publication dak sendakba nung senden ka Deputy Commissioner, Kohima indang Conference Hall nung January 15, 2021 anepdang 9:30 ako nungi amentsü, ta Deputy Commissioner aser District Election Officer, Kohima, Mohammed Ali Shihab Aajanga

Mongulbarnü sangdong ka nung metetdaksü.

Iba senden amenba mapang recognize süa aliba political party nungi teshimtet nübutem nem Final Roll indang hard aser soft copy kaka agütsütsü. Anungji iba maparen dak sendaka alir ajunga senden nung arua adentsü metetdaksür, ta Deputy Commissioner & DEO, Kohima ajangasa ashi.

Governor R.N.Ravi-i Poang Lum benjong salem lemsatap

Dimapur, Aenjeti/January 12 (TYO): Nagaland nung aliba nüburtem aser talisa Chang kin nungi adianu aser adianutsürtem dangi ni Poang Lum benjong salem abener, ta Nagaland Governor, R. N. Ravi-i sangdong ka ajanga lemsatap.

Pei peria aliba temaitsü Chang kin temi iba benjong ya amunger. Iba yagi aluyimba tenzükba osang sangoktsür aser alu tasen nung temoatsü alitsü atema benjonger.

Iba benjong yangi telungjem aser tesendaktep indang osang sangdonger. Ajidang masü, Chang nung tebour tajung sobalibaliru indang tanüla lanur nem agütsütsü nükjidong nung iba benjong ya amunger, ta sangdong ajanga ashi.

Nenoki iba benjong amungba mapang COVID-19 protocol nung aliba ama kumdanga benjong amungtsü ni ajak dang ajungshir, ta paisa ashi.

Maneni sangdong dang aka

nung NSCN/GPRN (Reformation) ajanga Chang Naga nung dang Poang Lum benjongmung tenting nung salem lemsatap, koba January tanabuba hopta nung tenzük aser January 13 nung atemer.

Alu aruba sülen Poang Lam benjong ya amunger, koba Chang Naga nung atema benjong tongtipang ka lir aser pei sasa pei dak metalokteta aliba tenüng nung iba benjong ya amunger, ta NSCN/GPRN (Reformation) indang Ministry of Information & Publicity (MIP) sangdong ka ajanga ashi.

Iba benjong nung tetsü-tebou ken tena tsüngsanger aser danga sobaliba maparen balala agi nüburtem pelateper aser chiyongba mapang alir.

Asenok putu tasen kati mejakoka aidang iba benjong yagi Chang Naga nung nem temaotsü aser yimji-yimjung bener arujang ta sarasademtsür, ta sangdong ajangasa ashi.

SP Kohima ajanga traffic atema metetdaksür

Dimapur, Aenjeti/January 12 (TYO): Kohima jila nung gari tem junga senzütetsü aser mesü-menang masütsü atema gari tulutem asoshi tang nungi tenzuka tarutsü nung totuyuba tasen ka magütsü tashi amshia alitsü ozüng kar, Superintendent of Police, Kohima, Manoj Kumar A IPS ajanga metetdaksüogo.

Kohima jila telungi gari tulu aitba ya Khuzama Police Check gate nung anepdang 8:00 ako nungi aonung 8:00 ako tashi nokdangtsü.

Dimapur tsütsü nungi Kohima leni atuba gari tulutem Chapru nung anepdang 7:00 ako nungi nikongdang 5:00 ako tashi nokdangtsü.

Kohima jilai gari tulutem aitba ya By-pass traffic police booth nungi anepdang 8:00 ako nungi nilongdang 6:00 ako tashi nokdangtsü.

Kohima jila nung anepdang 8:00 ako nungi nikongdang 6:00 ako tashi gari tulutem senzütsü memelatsü, ta sangdong ajanga metetdaksü.

Assam & Meghalaya atema COVID-19 vaccines tongogo



Mongulbar nikongdang Assam aser Meghalaya atema COVID-19 vaccines mezüngbuba shilem Gopinath Bordoloi International Airport, Guwahati tonga aruba noksa nung angur.

Guwahati, January 12 (Agencies): Mongulbar nikongdang Assam aser Meghalaya atema COVID-19 vaccines mezüngbuba shilem Guwahati tongogo.

Tanü nikongdang 5:10 ako meta Lokapriya Gopinath Bordoloi International (LGBI) Airport nung COVID-19 vaccines abenba tayimsü arua anenzk. Iba tayimsü nung mozü 732 kilograms bener aru.

COVID-19 vaccines bener arubaji airport anasa cold

storage nung yuogo.

Tanü bener aruba COVID-19 vaccines ji Assam aser Meghalaya atema 2 lakh 76 thousand doses lir.

Tanü Guwahati-i 20 boxes bener aruba nung 17 ji Assam atema aser 3 ji Meghalaya atema lir.

Centre sorkari Serum Institute of India dang Oxford-AstraZeneca COVID-19 vaccine 11 million dose meshiogo.

Mezüngbuba 100 million

doses atema vaccine dose ka atema Rs 200 agitsü, ta Serum Institute of India-i shiogo.

January 16, 2021 nungi Centre-i frontline workers nem coronavirus indang vaccine agütsütsü.

India nung health care & frontline workers million 30 nem vaccine agütsüba sen Centre-i agütsütsü.

Linük den külemi Northeast State ajak nung COVID-19 vaccination atema dry run agiogo.

Meghalaya nung party tasen tentetba ajanga Congress dak mekongshitsü

Shillong, Januar 12 (Agencies): 2023 Assembly elections matongdang party tasen ka tentet nunga Congress jenjang meraksatsü, ta Congress Legislature Party (CLP) lennir Dr Mukul Sangma-i ashi.

"1999 küm Congress-i kanga junga sayua anitetba lennir tejen kati party tasen ka tentet. Party tasen ka tenteterji Congress kechi tiai aitsü ta nisungtemi bilem, saka onok jenjang meraksa aser

tayongzükba ajak ajangtetogo" ta Sangma-i ashi.

2018 nunga Congress-i aniba sorkar nung adenertem aser Cabinet züngsemtemi party toktsür ao, ta Leader of Opposition Sangma-isa metetdaksü.

"Iba ama tayongzükba Indian National Congress (INC) dang masü saka political party mashi ka atema tayongzükba bentsür arutsü. Saka ibala tensa ajangtettsü atema onok inyakyim lir.

Lennirtem arur aotsü saka Congress party teti alitsü ta ni mapang shia nenshia ashir" ta paisha ashi.

"Party tasen tentet nunga Congress party tetsükdaksü majurutsü" ta Shillong Congress MP, Vincent H. Pala-ia ashi.

"Taoba Assembly elections nung People's Democratic Front (PDF) tentet saka party tilatem ochimashitiba lir. Tang aliba sorkar nung ochimashi kanga bulua inyakba angur" ta Pala-isa shisem.

Guwahati Municipal Corporation-i jana endokertem merenshitsü

Guwahati, January 12 (Agencies): Guwahati Municipal Corporation (GMC)-i yimti nung mega cleaning drive ka agitsü tenzükogo aser yimdong nung jana endokertem dang senchi achitsü.

GMC-i talisa trade-licence holders dang senchi achitsü.

Prime Minister Narendra Modi-i September 2019 nung 'Swachhta hi Seva' mission tenzüksüba kübok GMC-i mega cleaning drive tenzük.

Senchi achiba trade licence holder kati GMC indang executive engineer nungi no-objection certificate ka meshiba sülen ang licence

renew sütettsü.

"Yimdong nung jana endokba trade license holders (licensee) dang onoki senchi achitsü aser executive engineer nungi NOC mangu tashi parnok indang licence renew mesütsütsü. Parnoki menenba tesem parnoki merüktettsü" ta GMC ketdangsür kati ashi.



Manipur Chief Minister N Biren Singh-i Senapati district kübok Mao nung 'Virtual Cherry Blossom Festival' tenzüksüogo. Iba virtual festival nung Mao tobur ajungba sayutsü. (Imphal, January 12)

PM Narendra Modi-i Assam semdangtsü: Minister Sarma

Guwahati, January 12 (Agencies): Prime Minister Narendra Modi-i January 23, 2021 nü Assam semdangtsü akok.

Assam nung assembly elections agitsü lia PM Modi-i semdangba ya kanga tongtipang asütsü.

Prime Minister-i state nung BJP lennirtem aser party züngsemtem ajungmesotsü atema semdangtsü ta Assam health minister Himanta Biswa Sarma-i ashi.

Union minister Amit Shah-ia January 24 nü Assam semdanga

Nalbari aser Kokrajhar nung nüboyimba sentongtem nung adentsü akok ta Sarma-isa metetdaksü.

Shah-i December 26 nü Northeast semdangtsü atema Guwahati-i aru. Iba mapang pai Asom Darshan Scheme tenzüksütsü.

Asom Darshan Scheme kübok Assam ajungalen namghars 8000 nem Rs 200 crores agütsüogo.

Amit Shah-isa virtual ajanga Manipur semdang aser idakji terenlok mapatong aika tenzüksütsü.

Indo-Myanmar arrtsü nung foreign cigarettes aika apu



Aizawl, January 12 (Agencies): Hombarnü Indo-Myanmar arrtsülen Assam Rifles aser Mizoram nung Customs department ketdangsertemi Rs 1.20 crore alang foreign cigarettes puogo.

Assam Rifles aser customs department nungi joint surveillance team kati Zokhawthar nung foreign cigarettes apu.

Parnoki apubaji Zokhawthar

nung custom department ket nung agütsüogo.

Küm aika Assam Rifles-i Mizoram nung ozüing alema kechisarena shibelenba anema inyaka arur.

Iba ajanga Indo-Myanmar arrtsülen shibelenba maparen aika noktangogo ta Assam Rifles-i ashi.

Tawa tu Assam Rifles-i Mizoram nung anti-drug campaign ka tenzükba lir.

Tripura nung NLFT züngsem 4 apu



Agartala, January 12 (Agencies): Tripura kübok Sepahijala district nung police-i NLFT züngsem 4 tashi puogo.

Parnokji Lalthang Reang, Jiban Reang, Ganaram Reang (Ganga) aser Singhamani Reang nungertem ta jangjaogo.

Parnok ket nungi pistol 2, magazines 2, injang 17, SIM cards 4, sen tera aser tashiyim agisen meshiba shiditem ngutetogo.

Police-i par pezüji NCC police station ket nung agütsü aser iba sülen nisung kabo

Agartala East police station-i anir ao.

Tawa tu Border Security Force (BSF) Tripura frontier indang Inspector General-i Tripura nung telungpurtemi mapa kanga inyakba shiogo.

"Lockdown mapang mapa manguba ajanga Tripura nung lanur aikati ozüing memelaba mapa inyaker" ta Tripura police nung director-general-ia metetdaksüogo.

Taoba ita Dhalai district kübok Ganganagar nung NLFT telungpurtemi mapa inyaker asem pur ao.



TIR YIMYIM YIMOBILEM (EDITORIAL)

DIMAPUR RASEMNÜ, AENJETI (JANUARY) 13, 2021

COVID AJEM METSÜBUTSÜLA

Asenokbo akok tashi Covid-19 tashidak wara nungi jenbua alitsüsa pei kümdang-kümdanga liteper aser shisabolua bilembaji tangar atema shisabolur masü saka tashidak wara tesashi yagi kü dak atong nunga ta pei taküm asoshi shisabolua bilemer. Ajisüaka, tang ya alima tesem balala nung medical scientist aser researcher-tem aika amuia junga moi alima meimchirtem Covid-19 wara nungi kümzüksü asoshi shisabolua mozü yanglutettsü merangba mapang lir. Asenok shirangba mapang mozü süngjang tilaka achi nung mesüra ajem ka atu nung jungadoker. Ibaji aseni jungjunga bilemdangra tesüngmangtsüka lir. Item ajakji alima nung nisungtem tashidak wara nungi kümzüksü asoshi tekolok aser temang kanga anibeleva bilemdanga inyaker külenang yanglutetba mozütem lir. Iba kasaji meshirangdangyongi tashidak nungi kümzüksü atema, tanur asüdangyongi, nisung ajak yaksü aser polio mozü ama agidaktsür. Ibajisa tesüngmangtsü taketba lir, kechiyong polio tzüjang ka ajem nung polio agi matonger aser ajem tilaka aginung taküm piyong yaksü madoker. Aji oda, tashidak kar dak alaka, tashidak shia mozü kaka lir aser item mozü shiaji mozü yanglutetter kaka lir. Asenoki süokia ia mebilemdanger ashi, anogo shia item mozü yanglutetter tenüngtemji tetshia tenüngsang agüja amongtsüa langa lir. Tanüa asenokbo asen taküm kümzüksü dang bilema shisabolua among dang, alima tesem kar nungbo asenok ajak Covid-19 wara nungi kümzüksüa mozü bushirtem shisabolua inyadagi. Item jagi, joko, Covid nokdangtsü mozü nguteta lir. Item mozütem rongnung, India kija nung India nung medical scientist-temi ngutetba Covid-19 mozü ana lir, Covishield aser Covaxin. Covishield ya Serum Institute of India, Pune nung inyakerteri yanglutet aser Covaxin ya Bharat Biotech Ltd purtemi yanglutetba lir. Ana rongnungjia Covishield mozü ya teimba yangluteta lir aser Covaxin dang nungibo Covishield mozü yangang, ano, tetendanga junga tendangogo ta angazüker. Atangji, scientist-temi yanglutetba mozü ka government-i nübortem agitsü junger ta agizüktetbaji tapi agi agizüker masü saka shiruru dak süli aser nisung daka süli jungjunga tendanga repranger külenang agizüker aser nübortem nem agütsütsü melar, anungji kecha balaka arendaka mebilemtsüla. Joko, Covid mozü anapronglaji junger ta government-i agizüker asünungji, kopi melii January 16 nungibo iba mozü linük ajaklen agi tenzüksü. Atangji, khen nung nisung ajak nembo magütsütettsü, kechiyong tang tashi nungbo nütsüng ajak peritsüsa mozü ya yangluteta mali, anungji tamasa mozü kidang inyakerter nem agütsütsü aser iba sülen administration aser police-tem nem agütsütsü aser külenang küm tenem ser teka taintem aser temang nung timtem kanga alirtem nem agütsütsü. Aji oda, Nagaland nunga linük ajunga den külemi January 16 nü nungi mezüng government aser private mozü kidang inyakerter 19,690, tanabenren nung police aser administration nung inyaker nisung 30,000 aser tasembenren nung arishi küm 50 ser tema nisung 3,49,757 nem Covid mozü agütsütsü tenüng bendena lir. Tetezü, tang tashi nung nisung lakh pezü shi nem tama Nagaland nung Covid mozü agütsütsü aser iba sülenang arishi küm tenem ser teküpbok purtem nem agütsütsü. Osang tajung kaji, Northeast purtem asoshia Covid mozü Guwahati tongogo aser mozü ya state ajak nung angati dang agütsütsü. Atangji, mozü tasen agir asünungji arendaktsübjaji tim saka külen tashidak tsübur aser ano külen mozü agitsüa tsübur ta asünungbo tsübuseta asütsüba dang asütsü. Ajem agir asünungji, mozü agir külen nisung karbo temang ashitsüa akok mesüra shiranga aittsüa akok mesüra chi mechiyongnü akümtsü akok, anungji item tensa tia ajak nung doctor-tem den shisalemsatepa alitsübjaji tongtibang asütsü. Atangji, tanurtemi pei mang nung ajem atutsü tsübur, anungji ajeper saka parnok meshirangdaktsütsü asoshi tsüraburtemi parnokji zep ta soita yur mozüji agidaktsür, iba jagi parnok meshirangi tain akümer. Ibajiang asenoki bilemtetdi, aser asenokbo raktepa agitsüba dak alaka Covid-19 tashidak nokdangtsüba mozü agitsübo meratali aser metsübuli.

OLEMSABANG

HINDU YIMSÜI AZÜOKTSÜ MERANGBA MAPADONG

~ Wati Longchar (Serampore)

(Yashi adok nungi...)

- * Muslim pur ya telok tila (minority) rongnung nübu teimba asünungji, ozüng balala ajanga aser tashiyim mapa aika ajanga azüoka ayutsü meranger. Tat. agi, CAA (or CAB) ajanga temeküt linüktem - Bangladesh, Pakistan, Afghanistan nungi rishikangshi asüba ajanga Hindu, Jain, Buddhist, Christian aser Sikh küm trok tejaklen nungi Indiai arua alir, parnok India senso kümdaktsütsü melar. Muslim nungerbo iba nungji meten. Tetezü, Muslim nütsüng zuinra ta asüba tsübuba lir ta sayur. March 24, 1971 sülen Bangladesh nungi India nung arua alir parnok, India senso nung mezüngoktsü ta ozüng yangluba anema telok balala aikati ola adokogo. CAA anema longkak aitdang Jamia Millia Islamic University nung student dak azükba, aser Delhi nung Hindu nungertemi Muslim kiyong nung mi senoktsüba ajanga rongsen crores aika jenjang arongba aser nisung 13 tashi tepsetba osang nguogo. Muslim ajema kümdaktsütsü, tsübudaktsütsü aser jena odaktsütsü aser India Hindu nation kümdaktsütsü nükjidong nung inyaker ta shisarajemer aikati shiogo. CAA ya temzüng küma inyaka aonungbo North East India nung lisopur tajemba akümtsü ta tsübuttsü o jembiba mapang, MP Shri Tokheho aser CM Rio-i Article 371Ai Naga nungerbo kümzüksü, shisa bulutsü mali ta BJP-i aniba Govt. puhküm ola agütsüogo. Kechiba Naga nung lenir yamai aroka masadangi o tejashi o lenir aser tazünger aikati jembia arudagi.
- * Tanga yimsü mamangdaktsütsü asoshi anti-conversion law state ti tashi nung yanglua Khristan aika rishikangshiba ajurua arudagi. Mapang tatsüka tsüngda nung state aika nung anti-conversion law yangluyonga aotsü südi. Iba temzüng dak ajemdaker, yimtsüng kar nungbo kibongtem nung sarasadema aliba mapanga sünga azükba, ki rongdoktsüba aser mangsa yimdong nung maksüa jajadaktsüba aika ajuruogo. 1999 nung Australia nung leprosy hospital nung doctor Graham Staines aser par chir ana gari nung mi senloka rongseta südaktsüba, ano 2008 küm Kandhamal nung Khristan tamanger 39 tepset, tenlaki 395 rongdoktsü, 600 yimtsüng rongdoktsüba, 5600 ki-o-jen, dokan nungi oset-ts?set rakzüka bener aoba aser nisung merijang aika ki maka aküm kümdaktsüba atalokogo. Item ya asaa Khristan mekümdaktsütsü amokmerenba aser rishikangba lir. BJP yimsüsüba arur Muslim aser Khristan dak tashiyim amshia rishikangshibaji küm shia 800-1000 ka shibosa asür ta ashir. India nung BJP yimsüsüba arur religious mob kümteta, Government tazüokba kecha mali ama, Muslim aser Khristan attack süyonga, kenkenbo tetsür dak tashiyim amshir tepseta yutsüba osang angur. Saka aiben Goverment tenük amor yutsür. Ano tezüngmangtsükaji RSS and VHP telokibo India ajunga nung Ghar Wapsi, tetezü tanaben meyipa Hindu yimsüi anir aitba poja inyaka aoba angur. Ozüng balala ajanga aser tashiyim mapatem ajanga yamaji Khristan mekümdaktsütsü nokdang. Kechiba süra, India ya Hindu yimsü amanger lima ta angatetba ajanga yamai ataloker.
- * India Hindu lima aser Hindu yimsü tekümkükertem ta sayua yimden tashi arakmoktsü asoshi Muslim ya tsükchir tulutiba amai kümdaktsü. Tatashim shimba mapang ajak nung Hindu o Muslim na tsüngda communal tension adoktsüba ajangshia arur. Ayodhya nung Ram aso, anungji aji temeshi yimti. Yangji Hindu nung tekülem ki ka aliba raksatsür, Mughul yimsüsüba mapang Babri Masjid yanglu, anungji Hindu nung nem meyiptsütsüla aser yangji Hindu tekülem ki ka yanglutsü ta BJP sanen luden 1989 nung akangshia renemer, lenir L. K. Advani lenisüba nung Hindu ajungmesotsü aser lungjemdaktsütsü? atema Rath Yathra Somnath nungi Ayodhya tashi kilometre 10,000 September 25 nungi October 30, 1990 tashi, Ram asoba yimti nung tenlaki asütsü ta ayimokja jaja. Supreme Court-i temelaba magütetsü saka Babri Masjid akosa indokogo. Alima dang India ya Hindu country tulutiba ka ta sayutsü atema, aser alima ajak nungi arua reprangtsü, külemtsü asoshi Ram tekülem ki yanglutsü apuso-ogo. Iba den Muslim nung madak tashiyim amshitsü, amokmerentsü asoshi nashi political symbol ka tamang yimsü den sendaktepa tsüngrem amai kümdaktsür külen, nashi metepsettsü, shi mayoktsü, nashi shi machitsü ta state aika nung ozüng yanglu aser iba ozüng dak ajemdaker Muslim nung aika tepsetogo, aika dak zükogo. Yamaji state aika nung Muslim nung timtem ajuruba angur. Ano Muslim o Hindu na tsüngda kibalembu nokdangtsü atema "Love Jihad" ta, Muslim yimsü amangdaktsütsü mechi kibong akümba ta aija rishikangshiba, tepsetba osang aika azünger. Item ajak ya Hindu Rahtra ta sayutsü atema inyaker. Shiv Sena lenir Thackeray-i India lima Muslim nung yimjung nung linera, parnoki mapa asem inyaksüla (a) Hindu nungeri ama tetsür ka ka dang agitsüla aser tanur aika masotsü atema family planning amshitsüla (b) Nashi metepsetsüla ta Muslimi nokdaktsüla, aser (c) Hindu yimsü ya India nung tamangba yimsü ta agizüktsüla. Yamaji Hindu yimsü media ajanga sangdongba, shisashiba azüoka ayuba, yoga, astrology, nashi ambulance a.a. jembiba mapang ka lir. Tamang nung takang amai sayuba nükjidongji yimden tashi azüoka ayutsü merangba mapatem ta angatettsüla. North East India state ya pei sasa menokdaktetba statetem dang asünungji BJP külemtsüsa akümer. NE state ajak nung BJP government dang kümogo. Tzümetsüng tulu nungoka aruba ama "Hindu" No.1, tanga shilu, oshi, yimsü nungdak mali, anungji tashi mangartem merenshiang, rishikangshiang, rongdokjang, tepsetang ta Government tashi nung inyaka arudang, Nagaland, Mizoram, Meghalaya state nungi MP ka-ana oa nokdakdang "salt of the earth" ta kuli sütettsüsa, aser tasü ita ochi nung shilem agitettsüsa lenir shimtsüla. Sarasadema lenir shimdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Herod Chubai Yohan Baptiba kolak tangzüksü tuyuba tesem ngutetogo



Machaerus, Jordan nung Herodias'er jalai tsüngsangba aser Herod Chubai Yohan baptiba tekolak tangzüksü atema tuyuba tesem noksa nung angur.

January 12, 2021: Machaerus, Jordan nung Laishiba otsü nung shia aliba ama tsüngsangba aser Yohan Baptiba aitsüba tesem ngutetogo, ta archaeologist kati züluba kaket nung shia lir.

Archaeologist, Gyoza Vörös-i züluba kaket 'Holy Land Archaeology on Either Side: Archaeological Essays in Honour of Eugenio Alliata' nung shia aliba agi, Jordan nung aliba tesem nungji Herod Antipas Chuba amenba tesem lir.

Osangtajung kaket Mark tapu 6 nung, Herod Chuba pa tasoba anogo amongdang pa kinüngtsü Herodias'er jala arua tsüngsangba ajanga Herod aser tejaokertem peladaktsüba indang shia lir.

Herod Chubai Herodias'er jala dang, "Kü dang kechi meshinüdir meshiang aser ni nü nem ibaji agütsütsü," ta ashi.

Iba sülen tetsürla jagi tetsü dang "Ni kechi meshitsü?" ta asüngdang aser Herodias-i, "Yohan baptiba tekolak meshiang" ta ashi.

Osangtajung Mark tapu 6 nung shia aliba agi, Herodias-i Yohan dang jashia liasü, kechiyong Yohan-i, la Herod den kibong akümbaji ozüng alema lir, ta jembia liasü. (Lai Herod'er adianu, Philip den-a kibong aküm).

Idangyongjisa Herod-i Yohan baptiba tekolak tangzüka bener arutsü atema tuyu aser tepuokdak Yohan kolak tangzüka auso ka nung bener arua tetsürla nem agütsüba

sülen lai tekolakji tetsü nem agütsür.

Archaeologist temi, Yohan aitsüba takdangji 1980 küm nguteta liasü saka iba tesemji Herod Antipas chuba menden aliba tesem liasü ta tang tashi memeteti liasü, ta Vörös-i metetdaksü.

Takdang ka nung chuba menden alibaji ajanga tsüngsangba tesem ka liasü ta jangjar, ta Vörös-i ashi.

Putiotsü meteter nüngtugu, Josephus-i ashiba agi Herodias'er jala tenüngji Salome liasü.

Norwegian School of Theology nung professor, Morten Hørning Jensen-ia Yohan Baptiba aitsüba tesem ngutetbaji shidak, ta ashitsüsa kuliji kanga tajung, ta shiogo.

ANOGO ABEN TSÜNGREM DEN

Tsüngrem den chitepba
T.M 26:16

Na Tsüngrem den mechitepdang mapang talang ka nungi ne taküm nung pai mapa inyaka liasü. Mapang matongdang yongi Kibubai na metetba liasü, aser pai ne taküm asoshi kechi inyaktsü pai metetba lir (yr.1:15; T.Ken 139:13). Damaska among nung tenyar Paul temulung memeyipdang, pa nem kechi mapa agütsütsü Yisui junga metetta liasü. (T.M.9:15). Anungji Pauli mashi angatetta pai Tsüngrem tajungtiba nung tenzüksü merangdang, shidakba nung khristantem anema rara! Tsüngremi Paul asoshi kechi süner pai metetta liaka, pai pa mulungjang mokoktet tashi aser pa taküm nung kibur maküm tashi jungkai madoktsü.

Asenoki asen Kibuba asoshi kechi inyakner aji bushitettsü asoshi asen Kibuba maru. Pai pa mapa jungkai adokdaksütsü asoshi aser iba nung atentsü ajatsü asoshi pai asenok dang chiteper. Tsüngremi asenok nem anogo ka asoshi jangratemtsü osang ka dang magütsür. Pai asenok Laishiba metetba nung renloktsü indang mejembi. Iba dang nungi temaba mapa asen Kibubai asenok dang jungkai adoktsür, Pa mapa nung atentsü asoshi pai asenok ajar.

Tanü na Tsüngrem den ajuruteptsü renema lir ma? Paul ama Tsüngrem dang asüngdangtsü renema melira Tsüngrem nungi angashitsü tebushi, "Ni kechi inyaktsü, Kibuba?

Pakistan nung Muslim hungeri Khristan tsür ana tepset

Lahore (Pakistan), January 12 (Agencies): Pakistan kübok Lahore yimti nung Police-i January 4, 2021 nü Khristan tsür aianu ana tasü mang angu; Muslim ketdangsertemi tena dang Islam yimsü agizükdaksütsü atema rongshiba sülen tepset, ta osang ka ajanga metetdaksü.

Mushtaq Masih-i ashiba agi, January 4 nü police-i pa dang police-i pa kinüngtsü, Sajida Mushtaq aser la teno, Abida Qaiser na tasü mang shizüker nguogo ta metetdakja liasü.

Arrshi küm 28 Sajida Mushtaq ya tanur pezü tetsü lir aser Abida Qaiser tena yaküm November ita nung samar liasü, ta osang angazüker.

Osangbener den jembidang Masih-i, "Muslim nunger supervisors-i kü kinügngetsü aiben amokmerenba lai kü den lemsatepa liasü, ajisüaka lai iba tensa junga aziüktetdar ta shia aruogo. La samaba sülen ozü kinünger kati kü dang, kü kinüngtsü'er supervisor,

Muhammad Mumtaz aser Naeem Butt nati la aser Abida na dang Islam yimsü agizükang aser pa den kibong kümmang ta aiben rongshia aruogo ta ashiba metetdaksü," ta ashi.

Catholic sanitation worker, Masih-isa, pa kinüngtsü aser kinüngtsü teno na küm ana tejaklen nungi pharmaceutical factory ka nung inyaka aru, aser November 26 nü tena shishii ao saka kidangi meyipa maru, ta ashi.

Iba sülen Masih aser kinüngertemi Kahna Nau police station nung First Information Report (FIR) ka benoka liasü.

Iba ken o bushisüngdanger , Iftikhar Hussain-i, police-i Mumtaz aser Butt na apuba sülen tenati Khristan tsür ana tepsetbaji nangzükogo, ta metetdaksü.

Osangbener den jembidang Hussian-i, Mumtaz-i tetsür ana dangji pa den kibong kü mang ta rongshia aru aser pai tena tepsetba nangzükogo, ta metetdaksü.


H u s s i a n - i s a , "Asüngdangyaba mapang nung Naeem-i tetsür aianu ana apuba sülen anogo ishika tena dak mapa tamajung inyakba sülen terok rangdangja tepsetba nangzükogo," ta metetdaksü.

Masih-i, "Ni jabaso asem aser jala ka lir, tambusangji arrshi küm 11 aser tanubosangji arrshi küm 5. Abida bo jala ka dang lir. Tena samaba mapang nungi ozü tanurtem aser kinüngertem melung kanga zürepa liasü. Police-i onok dang tasü mang anaprong anguba osang metetdaksüdang onok kanga aoksa," ta ashi.

Punjab Province Minister for Minorities & Human Rights, Ejaz Alam Augustine-i asür kibongtem semdangogo aser aibelenertem aitsüogo.

Paisa, Punjab province nung Khristan tsürtem kangshia Islam yimsü agizükdaksüba kanga bulua ataloker, ibayongji sorkari ozüng ka benoktsü tebilemba lir, ta Minister-i metetdaksü.

Khristan film 'Gun And A Hotel Bible' ajanga award tenet agizük



January 12, 2021: Khristan yimsü nung ajemdaker yangluba film 'Gun and a Hotel Bible' ajanga film festivals nung award aika nguogo, aser tangbo iba film ya ajaki reprangtettsü. Gun And A Hotel Bible film ya tamangba yimsü dak sendakba telangzüba dang nungibo tasüngdangba timba aliba nisungtem atema lir. "Gun And A Hotel Bible" film ya Pete aser Gideon (Gid) na otsü lir; Pete ya mangyanga nisung tepsettsü tebilemba aliba nisung ka lir aser Gid ya

Pete anenzükba hotel takdang ka nung aliba Laishiba lir.

Khristan film ya ajanga LA Live Film Festival nung "Best Feature" densema award tenet nguogo.

Iba film yangluba nükjidong ya, asen timtem aser tebilemstsü khuret ajak k o k t e t t s ü s a Tsüngremji kanga tulu, ta asenok nem n e n s h i a metetdaksütsü


nükjidong nung yanglu.

Na koba tashika jenjang tamajung nung liaka Tsüngremi na yaritettsü aser na koba tashika jashia liaka Tsüngremi yaritsü melunga lir, ta iba film ajanga rajemtsür.

Iba film ajanga Laishiba nung shia alibatem agi asen taküm nung kanga kongshiba indang nenshia metetdaksür.

Film producer, Celeste Provart-i, iba film reprangba ajanga nisungtemi tangar den balaka süaka pei saka pei agizüktetba nung yaritsü, ta ashi.

OLONG PAITEP # 5692



TIPIEN

2. Auo nung chiyongsü asenba
5. Mangyimba mapang
7. O tamendakdak
8. Pei dak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

1. Lenmang
2. Aor kidong ka tenüng
3. Tenarong maten
4. A _ _ _ g
6. Mopung apodoka
ola adokdaksüba
9. Tongtipang tagitsü
10. Menungra bilem
11. Aiür
13. S _ _ _ k
14. T _ _ _ r

OLONG PAITEP # 5691 TELANGZÜBA


TIPIEN :

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon, 4. Aso,
6. Nile, 9. Alizüng, 10. Omen,
11. Lemta, 13. Ola, 14. Kin.

Agüja aliba noksa nung meputepi aliba bushiang



TANÜBO NAI LANGZÜANG

Q. CSIR-NPL, Council of Scientific and Industrial Research (CSIR)-The National Physical Laboratory (NPL) ya ____ yimti nung lir.

- A. New Delhi B. Mumbai
C. Chennai D. Kolkata

===== (Taruba adok nung onoki langzüksü)

YASHI ADOK TELANGZÜBA : 2014

NAI-A YA METETTER MA?

ASIA NUNG TAKARTIBA NISUNG 20 TARENSEN YAMALI LIR :



Rank	Name	Age	Country	Source(s) of wealth
1	Zong shanshan	64	China	Beverage
2	Mukesh ambani	63	India	Reliance Industries
3	Jack Ma	48	China	Alibaba Group
4	Ma Huateng	55	China	Tencent
5	Lee Shau-kee	92	Hong Kong	Henderson Land Development
6	Hui Ka Yan	61	China	Evergrande Group
7	Li Ka-shing	91	Hong Kong	diversified
8	He Xiangjian	77	China	Midea Group
9	Yang Huiyan	38	China	Country Garden
10	Tadashi Yanai	71	Japan	Fast Retailing
11	Qin Yinglin	54	China	Muyuan Foods
12	Takemitsu Takizaki	74	Japan	Keyence
13	Ding Lei	48	China	NetEase
14	Masayoshi Son	62	Japan	SoftBank Group
15	Colin Huang	40	China	Pinduoduo
16	Joseph Lau	68	Hong Kong	Chinese Estates Holdings
17	Zhang Yiming	36	China	ByteDance
18	Lee Man Tat	90	Hong Kong	Lee Kum Kee
19	Wang Wei	50	China	SF Express
20	Zhong Huijuan	59	China	Hansoh Pharmaceutical

SUDOKU # 5733

TELANGZUBA # 5732

8	2	5						6	4	5	6	9	2	3	8	1	7
			9		3	2	7	8	8	9	2	7	6	1	3	4	5
			8	2	6	1	5		3	1	7	4	8	5	2	9	6
			2	6					9	3	5	1	7	2	6	8	4
	8	9	5	1		4	2		7	4	8	5	9	6	1	2	3
7		2			4		6	5	6	2	1	3	4	8	7	5	9
	5		4			6			5	6	3	8	1	4	9	7	2
2		6			8	5	3	7	2	8	9	6	5	7	4	3	1
				3	5		4	2	1	7	4	2	3	9	5	6	8

OJANG LUTEP # 5280

NILER :
 ASTA :
 JUNTAG :
 NGAJAA :
 NDONLEG :
 MTTIEM :
 NGNUI :
 BEAIN :
 OKTELJI :
 ERKZÜÜMK :

OJANG LUTEP TELANGZÜBA # 5279

TAKAR DEN DANG MASÜ SAKA TILAR DENA TEMBAR
 YANGLUTSÜ MERANGANG

TAN HOPTA ATEMA - KOMA SÜLA ?

Q. Nagaland nung government mapa nung backward kintem atema reservation ayuba ya kin apia (tribe wise) masü saka kibong nun? senotsü ajangzüktetba apia (economic class) ayu nunga koma süla ?

Olong 20shi nung January 15, 2021 tashi nung iba telangzüba ya onok dangi (e-mail - tiryimiyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



Kolkata, January 12: Pune kübok Serum Institute of India nungi yokba Covishield vaccine mezüngbuba shilem temperature-controlled truck ka nung bener Kolkata nung central storage facility tonga aruba noksa nung angur.

States/UT 25 nung Covid-19 agi shiranger 5,000 tekübok lir: Health ministry

New Delhi, Aenjeti, January 12 (Agencies): Union health ministry-i Mogolbarnü, state/ Union Territories 25 nung coronavirus agi tonger temang anepalua alir 5,000 dak tajemba lir, ta ashi.

Ministry-isa, taoba ghonda 24 tsüingda India nung nisung 12,584 dak coronavirus tashidak potetogo, koba ita tenet tsüingda tajemtiba asütsü aser iba ajanga linük nung tashidak poteter 1,04,79,179 jungogo. Kasa mapang nung nisung 167 asüba sülen asür 1,51,327 jungogo, ta metetdaksü.

Tashidak aneper 1,01,11,294 jungogo aser iba ajanga national Covid-19 recovery rate 96.49 per cent kümogo aser Covid-19 case fatality rate 1.44 per cent nung lir. Covid-19 active

caseload lakh 3 tekübok lir.

Linük nung tang coronavirus tashidak menar temang anepalua alir 2,16,558 lir, koba total caseload shilem 2.07 asütsü.

Maneni ministry-isa, UK nung potetba tashidak tapu tasenba agi tonger alir nisung 96 lir aser taoba ghonda 24 tsüingda nisung ka dak danga iba tashidak mepotet, ta metetdaksü.

India nung Covid-19 agi shiranger August 7 nü lakh 20 ajung. August 21 nü lakh 30, September 5 nü lakh 40 aser September 16 nü lakh 50 ajung. Iba sülen September 28 nü lakh 60, October 11 nü lakh 70, October 29 nü lakh 80, November 20 nü lakh 90 aser December 19 nü crore ka adena liasü.

Indian Council of Medical Research (ICMR)-i ashiba agi, January 11 nü tashi nung sample 18,26,52,887 tendangogo aser item rongnung Hombarnü sample 8,97,056 tendanga liasü.

Taoba gohnda 24 tsüingda asür nisung 167 ya Maharashtra nungi 40, Kerala 20, West Bengal 16, Chhattisgarh 15 aser Delhi nungi 13 lir.

Tang tashi nung linük nung tashidak menar asür 151327 rongnung Maharashtra nungi 50,101, Tamil Nadu 12,228, Karnataka 12,144, Delhi 10,691, West Bengal 9,957, Uttar Pradesh 8,504, Andhra Pradesh 7,131 aser Punjab nungi 5,447 densema lir.

Health ministry-i ashiba agi asürtem shilem 70 bo tanga tashidak keta aliba ajanga asü.

Aluyimer lenirtem SC telemtetba pelashishia agizük

New Delhi, Aenjeti, January 12 (Agencies): Supreme Court-i aluyimba ozüing mebenoki atatsü tetuyuba agütsüba aluyimer lenirtemi Mongolbarnü pelashishia agizükogo, saka ashiba agi, iba ozüing magin tashi parnoki longkak aittsü. Tang longkak aita aliba aluyimertem lokti tentet 40-i tentetba Sankyukt Kisan Morcha-i, jenjang tapet ka agitsü atema senden ayongogo.

Aluyimer lenirtemi, Supreme Court-i shimtsüba committee ka matsüingdang inyakyimtem nung shilem agitsü memulunger,

saka iba telemtetba ya Morcha-i agitsü ta ashi. "Okadak ajanga aluyimba ozüing mebenoki atatsü tetuyuba agütsüba onoki pelashishia agizüker, saka onoki iba ozüing ya agindaktsüner," ta Morcha lenir tejen Abhimanyu Kohar-i ashi.

Kasa mapang nung ano lenir Harinder Lokhwal-i ashiba agi, parnoki aluyimba ozüingtem magin tashi longkak aittsü. Suprem Court-i Mongolbarnü osang tejangja ka magütsü tashi aluyimba ozüing mebenoki atatsü tetuyuba agütsüogo aser Centre o aluyimertem tsüingda

mangatetep aliba bentettsü atema committee ka tentettsütsü telemtetba agiogo.

Chief Justice S A Bobde lenisüba kübok bench kati ashiba agi, parnoki tetuyuba ka agütsütsü. Committee-i ozüing asem dak sendakba nung aluyimertem tashishiba angadangsü.

Aluyimertem meyrejang aika Delhi arrtsü nung tesem balala nung adenshia taoba küm November 28 nü nungi aluyimba ozüing asem ya agitsü khanga longkak aita arudar. Aluyimertem ya timba Haryana aser Punjab nungi lir.



January 12, 2021: Aluyimertem pei tractor bener Delhi leni longkak aiterter den adentsü aoba noksa nung angur. Aluyimertem Republic Day nü tractor march ka ayongzüka agitsü sentong lir.

"Dynastic politics" raktoktsüla: PM Modi

New Delhi, Aenjeti/January 12 (Agencies): Ato Kilonser Narendra Modi-i Mongolbarnü, dynastic politics ya democracy tsükchir tulutiba lir aser raktoktsüla, ta tanabuba National Youth Parliament Festival valedictory sentong nung ashi.

"Dynasty politics ya tetsükdaktsü ka aser raktoktsüla. Pei tenüing dak ajemdaker election nung toktepertem tajemba kümogo, saka iba tashidak ya ano mesamai lir," ta Ato Kilonseri ashi.

Lanurtem dang tarutsü nung linük anitsü ajungshi pai yimden yimsüsüba ya India nung temelenshi asoshi tashi tulu ka lir ta ashi.

Ato Kilonser Modi-i, Swami Vivekananda asoba anogo amungba, National Youth Parliament Festival ya kanga tongtibang anogo ka lir ta shia, lanurtem dang yimden yimsüsüba nung telongjunga shilem agitsü ajungshi. Paisa, Swami Vivekananda nem akhüm tetushi agütsüba den pa dak sendaka aliba onüktem

aika lemsatep.

"Tanü ya kanga tongtibang anogo ka lir kechiyong National Youth Parliament Festival ya Parliament Central Hall nung akar, kong temzüing ozüing yanglua liasü," ta PM Modi-i ashi.

National Education Policy (NEP) tasenba ya lenla ajak nung ternlok asoshi lir, ta PM-i ashi. "National Education Policy tasenba ya linük yangertsü atema jenjang ka lir. Lanurtem nem maongka tajungba agütsütsü atema onoki inyakyim ka benokdar," ta pai ashi.

Taküm National Youth Day 2021 ya 'YUVAAH-Utsah Naye Bharat Ka' omen nung ajemdaker mungogo.

Swami Vivekananda shiba 1863 küm aso pa nem akhum tetushi agüja 1985 küm nungi January 12 nü ya National Youth Day ama munga arudar. Vivekananda ya 1902 küm July 4 nü arishi küm 39buba nung asü aser pai Chicago nung 1893 küm Parliament of the World's Religions nung o jembiba ajaki jangjaa lir.



Jan 12, 2021: Parliament House Central Hall nung National Youth Parliament Festival-2021 valedictory sentong nung takoker Mudita Mishra (Uttar Pradesh), first runner-up Ayati Mishra (Maharashtra) aser 2nd runner-up Avinam Manger (Sikkim) nunger tangokba noksa nung angur.

Rahul Gandhi-i Tamil Nadu semdangtsü

Chennai, Aenjeti/January 12 (Agencies): Congress lenir Rahul Gandhi-i, January 14 Pongal anogo nung Tamil Nadu semdangtsü aser nashipongshi azüokba benjung 'Jallikattu,' reprangtsü, ta party state tir K S Alagiri-i Mongolbarnü ashi.

Gandhi-i, aluyimba ozüing anema longkak aita aliba aluyimertem pusema Madurai district kübok Avaniapuram tesem nung iba asaya reprangtsü, ta pai osangbenertem dang ashi.

"Nashipongchi ya aluyimertem atema temaitsü ka aser parnok taküm nung shilem ka lir," ta Tamil Nadu Congress Committee tiri ashi. Aluruba benjung anogo aluyimertem nem aser tamil nunger sobaliba nem tetushi agütsütsü atema pai semdangtsü aser iba anogo pa election atema nüboyimba sentong nung shilem magitsü," ta pai ashi.

Tamil Nadu nung assembly election April-May nung agitsü. Ghandi indang sentong ya 'Rahulin Tamil Vanakkam,' ta jaja pai iba sentong ya AIADMK yimsüsüba atsüngtoktsü atema lir, shirnok Centre den longjemer lir.

Tamil Nadu Chief Minister K Palaniswami aser par party AIADMK-i dang, aluyimba ozüing asem pusema liasü aser political party kati danga iba ozüing pumasem, ta pai ashi. Gandhi, Madurai 11 ako nung atongtsü aser iba jila nung ghonda pezüshi kazütsü.

Aluyimertem den sensaksem amala sentong kecha ayongsüka agitsü sentong mali, saka lenirtemi dang jangrara iba amala sentong ka ayonga agitsü, ta Alagiri-i ashi. Maneni DMK tir M K Stalin mesera tanga lenirtem ajurutsü atema Gandhi sentong kecha mali, ta pai ashi.



Bristol, England nung nübur ajunga nem COVID-19 mozü agütsütsü tesem ka amenoka alidaki Britain Ato Kilonser Boris Johnson, tiyong, oa yangji ketdangsür jembishinüba anga alidang tangokba noksa nung angur. COVID-19 anema nübur nem mozü agütsütsü atema sorkari linük tesem tenet nung iba ama mass public vaccination centres lapokogo.

Germany nung COVID-19 agi asür temang merongmar

Berlin, Aenjeti/January 12 (Agencies): Meissen crematorium indang somber memorial hall nung nisung tasü mang süngden mesemi nangtena lir. Item süngden ya aika plastic agi kanga junga nembanga lir aser kar nung "infection risk," "urgent" mesüra "COVID" ta zülua lir.

Germany anüdoklen kinük nung coronavirus agi nisung asüba tali akumba ya crematorium manager Joerg Schaldach aser pa den inyaker atema business tajungba kumdaktsür, saka shingaia ibaji pela magizüker.

"Tang aliba tensa ya kanga majung lir," ta Schaldach-i ashi.

Küm shia tang mapang iba crematorium nung nisung tasü mang aliba süngden 70 nungi 100 tashi alir, kechiaser iba mapang yimra agi teintet rogotem takum agir.

"Meyi mapang dang nungi mongpu mapang nisung timba asüba yabo tesüng mangtsü mali. Yamaji teti ataloker," ta

Schaldach-i ashi.

Saka tang pai ketdangsüba crematorium nung nisung tasü mang 300 arongtsü ata lir aser anogoshi iba tesemi nisung tasü mang ter dak tema bener arutsür.

Hombarnü iba Meissen county nung COVID-19 putetba ya Germany tesem ajungalen putetba dang asemsü agi timba liasü.

Schaldach-i ashiba agi, mimong ana nung minute 45 shia mi apor aser anogo ka nung nisung temang 60 tashi rongteter.

"Ajisüaka mitsü bo shidak lema agütsür," ta pai ashi.

Kinungertemi asür mangjak angutsü makoker, kechiaser COVID-19 agi asüba sülen süngden nung inokba ya melapokdaktsüi rongdaktsür.

Iba tesem nung yimten yimsüsür temi mask agiba nung tai apuba, lokti tulu madenshitsü tenokdangba agütsütsü memolungba aser store tem meshibangdaktsüba

ajanga tashidak ya sashia akumer, ta dangartemi ashir. Karibo coronavirus tashidak mali, ta shia liasü.

Ano külen iba state nung teintet rogo jenti lir aser parnok ya nursing home nung yutsür, shirnok anasa aliba Czech Republic nungi arua anepalur, kong COVID-19 tashidak wara ya Germany dang nungi kanga agi tali lir.

Iba county administration tekolakba, yangji aliba doctor association, parliament züngsemtem aser Chancellor Angela Merkel den sendaktepa alirtem densema Meissen nung ketdangsürtemi osangbener den iba tensa indang jembitsü memolunger.

Saxony indang governor, Michael Kretschmer-i tawa osangkaket ka den sensaksemba mapang, state nung iba tashidak wara süoki ia magizük aser pai shishilempaba tesemtem aser school tem lapoktsü atema akhangba nung temolung tali agütsü, ta shia liasü.

COVID-19 mechi Malaysia nung state of emergency sangdonga lir

Kuala Lumpur, Aenjeti/January 12 (Agencies): Coronavirus tashidak agi meneper tali akumba anema raratsü asoshi Malaysia chuba, Al-Sultan Abdullah-i linük ajungalen ita ishika atema state of emergency benokogo.

Iba mera ya Ato Kilonser Muhyiddin Yassin-i benok aser sorkar tashi meiti aliba mapang parliament khen atema shibanga atatsü pa nem temelaba agütsü.

Tekeraba nung tensa mazüoktetra emergency ya August 1 tashi alitsü, ta chuba yimli ajanga ashi.

Iba mera ya ajanga Muhyiddin indang tashi mait sorkar nem lenmang lapoktsür, ta sorkar anemertemi ashir.

Taoba küm March ita züngsem tera agi timba nung ato kilonseri sorkar tentet, saka teloktep party temi pa sorkar busemba nungi ainshitsü ta amokmerenba ajanga anojungi election agitsü inyakteper.

Küm 50 nung tang mezüngbuba state of emergency ya chuba Sultan Abdullah Sultan Ahmad Shah-i Hombarnü sangdong. Iba ya ajanga Malaysia indang parliament aser yimtenren inyakyim khen atema anendaktsür aser sorkar nem tashi tasen agütsür.

Linük tesem timbalen Muhyiddin-i coronavirus mechi tenokdangba tasen benoker anogo ka lir iba osang ya sangdonger.

Muhyiddin ya ato kilonser menden nung mener ita ter dang aser pai nüburtem den television ajanga jembiba mapang emergency sangdongba ya mitkar tashi amshitsü atema masü aser curfew mebenoktsü, ta ashi aser tashidak wara azüokba sülen general election agitsü temolungtetba lir, ta metetdaktsü.

State of emergency sangdongba ajanga sorkari nija mozüki amshitsü melar, mitkar aser police talila yoker. Malaysia nung taoba küm talangba ka tenokdangba tesashi benokba ajanga coronavirus azüokteta liasü saka item tenokdangba agienba sülen iba virus agi meneper timba kümogo.

Indonesia-i Sriwijaya Air indang black box agitetogo

Jakarta, Aenjeti/January 12 (Agencies): Hopta tatemlen Java Sea nung tsüokba Sriwijaya Air tayimtsü indang black box ka Indonesia ketdangsürtemi ngutetogo, ta navy odongtar kati Mongulbarnü ashi.

Tayimtsü anirtem o jembiba mangaokba oset ya Jakarta nung rong anendaki bener ao, ta odongtar Fajar Tri Rohadi-i osangbener dang ashi.

Yangji aliba television nunga plastic box temesüng ka nung iba oset inoker speed boat ka nung bener aruba nguogo. Ibai tayimtsü indang data recorder asü cockpit voice recorder ngutetbar ano mejangja.

Transport Minister Budi Karya Sumadi aser ketdangsürtemi Mongulbarnü menur osangbener senden ka agitsü sentong lir.

Boeing 737-500 tayimtsü nung nisung 62 mener Jakarta indang tayimtsü anendak nungi apusor minute pezü lir Java Sea nung Honibarnü tsüoka liasü.

Tayimtsü tsüokdak nungi Mongulbarnü nisung temang shilemtem aser identification card aliba wallet tem tali ngutet.

Iba tayimtsü ya Jakarta

nungi kilometer 740 shi pilar Borneo asetkong nung aliba Pontianak tesemi aodang radar screen tem nungi sama.

2018 küm Lion Air Boeing 737 MAX tayimtsü nung passenger aser tayimtsü ketdangsür nisung 189 mener Jakarta nungi ayamesor mapang tatsüka tsüngta Java Sea nung tsüoka tayimtsü nung mena alir ajak asüba sülen ibai Indonesia nung tayimtsü lendong tanabuba alitsü.

Honibarnü tsükokba tayimtsü ya design balaka liasü.

Flight data aser cockpit voice recorder ngutetba sülen tayimtsü nung timtem adokba indang osang tejangja anogo asem tsüngta metettsü, ta Indonesia indang National Transportation Safety Committee (KNKT) ajanga ashi.

Tayimtsü ayamesor mazüokteti lendong tulu ajuruba indang osang tejangjabo flight recorder tem nungi ang metettsü.

Sriwijaya Air tayimtsü ya yanglur küm 27 shi liasü, koba Boeing indang timtem agi sünger aliba 737 MAX model dang kanga agi tejenba alitsü. Saka 737 model tejentem nung timtem tulu ajangshia maru.

Pakistan nung polio mozü agütsür meina senzür police ka khaset

Islamabad, Aenjeti/January 12 (Agencies): Northwestern Pakistan nung police kati polio agütsüba telok ka meiner senzürba mapang gari nung arua parnok amakba mapang police ya asü.

Linük tesem ajungalen anogo pongu mozü agütsütsü sentong tenzüker ananü buba, Mongulbarnü Khyber Pakhtunkhwa province kübok Karak jila nung iba lendong ya atalok.

Karak jila nungi kilometer 20 shi pilar Latumbar tesem nung iba lendong ya anepdang 10:10 ako (par mapang) atalok, ta yangji alir police tanishir kati osangbener dang pa tenüng memetetdaktsüi ashi.

"Constable Junaidullah ya Latumbar tesem nung polio security duty nung liasü. Lendong agütsür ya motorcycle nung aru aser pa dak injang khaloktsü, aser iba mapang polio vaccination team ya gari nung liasü," ta pai ashi.

Iba lendong nung dangar shinga meyiru aser polio vaccination drive ya maneni agi.

Taba küm Khyber Pakhtunkhwa province nung polio cases 22 liasü aser item rongnung Karak aser iba anasa aliba district tem nungi cases

15 liasü, ta ketdangsüri ashir.

2012 küm nungi tenzüka polio vaccination team aser parnok nem security agütsür dak amakba mapang asür ajak agi 102 jungogo, ta ashir.

Pakistan aser Afghanistan dak alaka alima nung aliba linük ajunga nungi polio tashidak samaogo, ta United Nations-i ashir. Linük ana nungya polio agütsür dak temolung malemer.

Pakistan kübok Abbottabad yimti nung CIA ajanga nüburtem nem mozü agütsür ta tiazü nung sentong balala ayongzüka al-Qaeda tentetsang Osama bin Laden tsüngsü apuba sülen polio vaccine anema nokdakba tali akum.

Pakistan nung anisüngzük maliba tesemtem, ta northwest tsütsü mozü agütsür nem sepaitemi tanükba agütsür.

Aser polio agütsüba mapang timtem balala ajuruba ajanga nüburtem nem coronavirus mozü agütsütsü khuret tulu arur.

Pakistan nung frontline worker 285,000 shi teyari amshia tanur arishi küm pongu nungi tükebok alir million 40 nem polio mozü agütsütsü sentong tenzüka lir.

Bihar Congress in-charge asütsü Bhakta Charan Das shim



Patna, Aenjeti/January 12

(Agencies): Tawa shiba Bihar Congress in-charge Bihar Bhakta Charan Das-i Hombarñü party lenirtem dang longjemmer alitsü aser aluyimba ozüngtem dak sendakba nung nüburtem nem tangazükba agütsütsü aser state nung osetsüt aser petroleum product tem nung jenjang ajungketba anema longkak aittsü atema nüburtem ayongdentsü ayongzük.

January 5 nü Congress lenir Shaktisinh Gohil-i party lenirtem dang Bihar in-charge bener aliba nungi anisüngzük agütsütsü mepeshia liasü. Taoba küm Bihar nung Congress aser parnok den lokteper aliba party temi election makokba sülen ita ishika lir pai iba jenjang agi.

State in-charge asütsü shimba sülen Das-i, Bihar Pradesh Congress Committee (BPCC) lenirtem den

Sadaquat Ashram nung sensaksema liasü.

Taoba otsü aser tatalokbatem lephsia Das-i ashiba agi, Bihar-i yimden yimsüsüba nung linük ania aruogo ta ashi.

"Lenirtemi iba lima koda tongtibang ibaji angatettsüla aser taoba mapa party wanshia aliba jenjangi tanaben anir arutsü nüngdaker. Party-i Rajendra Prasad aser Maulana Mazharul Haque nunger amala lenirtem linük nem agütsüogo. Lenirtemi pei jenjang toktsür lokti tekübokba jenjang nungi anitettsü atema longjemmer inyaktsü nüngdaker," ta Das-i ashi.

Congress leniri ashiba agi, petroleum aser liquefied petroleum gas (LPG) nung jenjang aika kümogo, kechiyong state sorkari saru tali sarur aser linük rongsenketsüng jenjang mejungi aliba mapang iba ajanga nüburtem peisasa anepalutsüsa akümer.

Kohima-By-Pass, 2-Lane compensation atema metetdaksür

Dimapur, Aenjeti/January 12

(TYO): Deputy Commissioner, Kohima, Mohammed Ali Shihab A ajanga sangdong ka nung ashiba agi, Kohima-By-Pass, 2-Lane Project - chainage 0+00 to 10+500 (1st package) atema land compensation ya Deputy Commissioner, Kohima

indang office nung January 15, 2021 anepdang 10:00 ako nungi agütsütsü, ta iba project agi kongshia aliba ali kibur ajak nem metetdaksüogo.

Iba dak sendakba nung ali kiburtem dang tawa tangokba passport size photo (scan masü) pezü aser Aadhar card (Xerox)/ ID Proof aser Bank

Passbook (front page Xerox) bener tsüngdong arutsü metetdaksüogo. Ali kibur dang alaka dangar nisung shinga nema iba senotsü ya magütsütsü. Kasa mapang social distancing yimya amshitsüla aser ajaki mask agitsüla, ta sangdong ajangasa ashi.

Angami Gazetted Officers Krotho pur ki meshitetba sentong agi

Dimapur, Aenjeti/January 12

(TYO): Angami Gazetted Officers Krotho puri Kohima nung APO pur indang conference hall ka tasen kuma yanglushir meshitetba sentong ka January 12, 2021 nü agia liasü.

Iba sentong nung jembiba mapang Advisor, AGOK, Daso Paphino-i APO ki yangluba otsü süok, koba 2006 küm tenzük aser 2009 küm renema liasü. Lenmang ajaklen nungi rongsen bendenba ajanga iba ki ya mapang shidak nung renema liasü, ta pai ashi.

Paisa, 'kin balalai ki

yanglutsü ya kanga tongtipang, kechiaser iba ya ajanga kin ka indang yimya aser jakla sayur, anungji nüburtemi item ya kanga junga wazüka ayutsüla aser kumdanga amshitsüla,' ta ashi.

Angami Public Organization nung vice president, K.T Vilie Theiinuo-i kasa sentong nung jembiba mapang, AGOK ya mendeni APO ya tashi mait lir, ta ashi. Angami nunger ajangzüktsü atema AGOK ajanga aria bilema inyakba asoshia pai pelaba lemsatepa liasü.

Iba sentong nung Director ABCCTK, Rev. Vicavor Krose ajanga conference hall yanglushir aliba ya meshiteta sarasademtsü, APO tir aser iba sentong nung mendenpuba, Dr. Kedozeto Punyii-i iba ki yanglushiba indang osang tejangja lokti nem metetdakja liasü.

NTC-i asükhu lemsatep

Dimapur, Aenjeti/January 12

(TYO): Taoba mapang NTC Member Advisor Krurovi Peseyie asüba osang angazüka Nagaland Tribes Council (NTC) aoksaba aser mang ayimba NTC tir Toniho Yepthomi aser General Secretary Nribemo Ngullie nati sangdong ka ajanga lemsatepogo.

Krurovi ya January 11 nü Dimapur nung asü. Pa kanga teyakyak, tenendak aser lokti ajungkettsü atema bendanga agüja inyakba nisung ka liasü. Pa asüba ya Naga nunger ajak asoshi takoksa tulu aser pa melener angutsü tasak asütsü.

Nagaland Tribes Council (NTC)-i asür kinungertem den asükhu lemsateper aser tulusang Tsüngremi mangyim jashi koktettsü atema parnok nem tashi agüjang ta aser asür tanüla teti yimjung nung anisüngzükdkajang ta sarasademtsür, ta kasa sangdong ajanga lemsatep.

Kibong Kümer Küm 50 Ajungba Tepela Anogo



Mr & Mrs.T.Limba (Akhoya)

January 13, 2021.

Tsüngrem tauchi agi temeim Ojala aser Obala na kibong kümer küm 50 tashi anir aruba takok asoshi tena dang kanga pelar aser Tsüngrem tenüng asanger.

Ano, Tsüngremi maneni Ojala aser Obala na prongla taküm tajung aser arishi talang moajangma.

- Temeim Chirnur aser kinungertem.

Mulungnen O

Kecha meimlaika, ajungbena ozü

temeim **N. Asenla Pongen**

(Chungtiayimsen) Dimapur nung mapang tatsüka shiranga mozü kidang amongdang aser la December 20, 2020 nü iba lima nungi pilar, onok mangyim jashi nung alidang, kija, kibong, kidang-kiyonger, lokti tentet aser arogotem nungi shirnokisa onok dang meima sarasadem, nübo aser rongsen agi yariogo, nenok ajak den onoki kanga pelaba lemsateper.

Tsüngremi nenok temeim mapatem meyipa moajangma ta onoki sarasademtsür.

~ Temeim Kinungbo aser Kinungertem.



PELABA LEMSATEPER

CHUBABOLA LEMTUR (MONGSENYIMTI)

ASO : 20.05.1959 ~ ASÜ : 05.01.2021

Onoki teti meima aliba asür CHUBABOLA LEMTUR (Mongsenyimti), la shiranga aliba anogo nungi akümüli tembangba anogo tashi kija, kibong, lokti, arogo shirnokisa nübo, rongsen aser sarasadem agi yariogo nenok ajak den onoki kanga pelaba lemsateper. Tsüngremi nenok ajak moajang ta ozü sarasadem.



Temeim kinungbo, chirnur aser semchir.

For Sale Land with Building

Measuring approximately 20,000 sq.ft.

Location: Above New Market,

Arkong Ward, Mokokchung

(Genuine Buyers only) Contact : 9436005217

KBPF-i "Pray for Kohima" sentong ayonga agi

Kohima, Aenjeti/January 12

(TYO): Kohima Baptist Pastors' Fellowship-i "Pray for Kohima" omen nung ajemdaker tanep 6:00 ako nung sarasadem mapang ka ayongzüka agiogo.

Sarasadem sentong ya Kohima yimti kübok High School Junction, Razhü Point Junction, Old MLA Junction aser P.R Hill Junction nung agi. Tesem balala nung sarasadem sentongtem ya Pastor Rev. Velavoyi, Pastor Dr. Ruokuovilie Sachü, Pastor Temjem Sempo aser Pastor Dr Mosa Tsang nungeri ania liasü.

KBPF tir Dr. Kevichalie Metha-i Pastor ajak, Rev Dr

Zelhou Keyho-i anir NBCC team aser "Pray for Kohima" sentong nung shilem agiba tamanger ajak dang kanga pelaba lemsatepogo. Tir-isa, Kohima nung alir ajak den küm tasen temoatsü salem lemsatepba den Administrations, Police Personnels, Media, Kohima Municipal Council aser state kübok Departments balala densema COVID-19 den yakbang nung raratem ajak dang anibelem mesasai nüburtem kümzüka toktsütsü atema meranga inyakba atema kanga pelaba lemsatep aser sarasadem nung teti nongita yaritsü nangzük.

Assam election atema BJP-i tejak tasen aika shimtsü

Guwahati, January 12

(Agencies): Assam nung state Assembly Elections nung tejak tasen aika toktepdaksütsü sentong lir.

Iba osang ya NEDA Convenor aser Assam Minister Himanta Biswa Sarma-i ashi.

"BJP nung züngsem tasen aika lir anungji temelenshi kar alitsü" ta Sarma-i ashi.

Hombarñü Minister Sarma-i BJP National President JP Nadda den senden ka amenba sülen iba osang lemsatep.

Election nung takok angutsü ajitetba candidate nem ang ticket agütsütsü, ta Sarma-isa shisem.

Hombar nikongdang tesü Guwahati nung Assam Chief Minister Sarbananda Sonowal, State Health Minister Himanta

Biswa Sarma, Assam State BJP President Ranjit Dass aser BJP National president JP Nadda nunger dena Assam nung BJP lenirtem senden ka amen.

Iba mapang Assam Assembly Elections agitsü aliba atema BJP asalentong lemsatep.

"Election dak sendakba onük aika jembioogo aser iba nung party inyakyim tashi itshitsüba liasü" ta Assam BJP President Ranjit Dass-i ashi.

Hombarñü Silchar nung JP Nadda-i "Vijay Sankalp" rally agiba sülen state Assembly election atema nüboyimba maparen tenzüktsüogo.

Züngsem 126 agi akümba Assam Legislative Assembly atema taküm March-April tsüngda election agitsü.



La Spezia, Italy, January 12: Spezia aser Sampdoria na La Spezia, Italy nung asayaba mapang Spezia nungi asayar Claudio Terzi-i goal ka indaktsüba noksa nung angur. Iba asaya Spezia-i goal 2-1 agi kokogo.

PL nung nisung 36 dak COVID-19 tashidak potet

London, Aenjeti/January 12 (Agencies): Premier League-i Hombarnü ashiba agi, taoba hopta nisung 36 dak COVID-19 tashidak potetogo. Linük nung tashidak nisung aika dak potetba den asaya aika thinenaka English top-flight season tanenmakai asayayonga odar.

Premier League season tasenba tenzükba sülen tashidak 21 ben tendangba nung asayar aser staff 207 dak novel coronavirus tashidak keta aliba potetogo.

December ita nungi tang tashi nung COVID-19 tashidak potetba ajanga Premier League asaya aika thinenogo. Tesüsa Bodhbarnü Aston Villa aser Tottenham Hotspur na asayatsü aliba thiogo aser iba ajanga asayamung mapanglem yanglushitsüsa aküm.

Asayamung khen atema

anena atatsü atema aikati shiaka Premier League-i mid-season break ka agitsü atema telemtetba magi aser ashiba agi, asayatem asayayonga aotsü atema COVID-19 dak sendakba nung inyakyim benoka alibatem dak parnoki tamang akar.

League-i maneni asayatsü atema telemtetba agiba sülen Newcastle United manager Steve Bruce-i iba telemtetba agitsüogo aser ashiba agi, linük nung tashidak menar tali küma aoba mapang football maneni asayatsü ya tim masü.

Kasaji Arsenal manager Mikel Arteta-ia shiogo. "Alima ajunga nung aser linük nung tensa apir iba telemtetba ya tim masü aser maneni asayayonga aotsü ya balaka bilemer," ta Arteta-i ashi.

United Kingdom nung nisung million 3 tema dak COVID-19

tashidak potetogo aser tang tashi nung iba tashidak yagi nisung 81,000 dak tema süogo.

Newcastle, Manchester City aser Fulham nung hopta tsüngda tashidak ajanga timtem agitsüogo aser asayatem aika dak tashidak potetba den aika lokti nungi pilaa alitsüsa akümiba sülen asaya thinentüsü aküm.

Scotland indang lower league tembo January 31 tashi hopta asem atema masayai atatsü telemtetba agiogo, kechiyong COVID-19 tensa tamajungba küma odar. Kasa mapang nung English soccer minor league asemin season tembangdakja tanga asayar aibatem masaya kümdaktsütsü khangogo.

Ato Kilonser Boris Johnson-i taoba hopta linük mokdanga ayutsü tetuyuba tasen agitsüogo, saka Premier League bo asayatsü asoshi maletsü ta ashi.

Thailand Open: Sindhu, Praneeth tsükogo; Ashwini-Satwik-i takok angu

Aenjeti/January 12, 2020 (Agencies): Mongolbarnü PV Sindhu Thailand Open mezüngbuba round nung tsükogo. La Denmark tsür Mia Blichfeldt 16-21, 26-24, 21-13 agi koka liasü.

Kasa mapang nung B Sai Praneeth-a Thailand nunger asayar Kantaphon Wangcharoen-i 16-21, 10-21 agi koka mezüngbuba round nung tsükogo.

Kasa mapang nung tarep temeyoktep asaya nung Ashwini Ponnappa aser Satwiksairaj Rankireddy nati 21-11, 27-29, 21-16 agi Indonesia nunger tarep Hafiz Faizal aser Gloria Emanuelle Widjaja na koka liasü.

Sindhu aser Blichfeldt na asaya mezüngbuba game nung Sindhu-i kanga junga asaya

aser Blichfeldt court telung nung kanga asemzudaktsü. Blichfeldt-i asaya tepeyong kanga meranga asaya saka tetenzük nung tajangzük mangu.

Tanabuba game tom nung Sindhu tejakdang liasü aser asaya akoktsü lia Blichfeldt-i kanga meranga asayar point 15-15 aküm.

Blichfeldt nem menepdaktsüba atema Sindhu tezü adang aser aji la asaya nung reprangtet. Lai smash tem net nung zükloktü tenzük aser anibeleva aküm.

Tasembuba game nung Sindhu kanga belematoker liasü. Lai smash aika zükpetba den aika tezülani züktoke liasü.

Maneni Praneeth aser Wangcharoen na asaya tetenzük nungi Wangcharoen-

i amokbanger asaya aser game anaprongla pai ayong ayonga akok.

Tarep temeyoktep asaya nung Ashwini-Satwik nati mezüngbuba game kanga junga asaya tenzük aser 11-5 agi tejakdang aküm aser asaya ayong ayonga akok. Ajisüaka tanabuba game kanga toktepa asaya. Ashwini-Satwik na 19-17 agi tejakdang liasü saka Faizal-Widjaja nati point asem atonga ngua asaya akok.

Tatembangbuba asaya nung Ashwini aser Satwik na tejakdangser tenzük saka Indonesia nunger tarep yagi point pezü atonga ngua point 13-13 aküm. Iba sülen Ashwini-Satwik na 16-13 agi tejakdang aküm. Faizal-Widjaja nati meranga asaya saka asaya makok.

Saina aser Prannoy na dak Covid-19 tashidak potet

Hyderabad, Aenjeti/January 12 (Agencies): Saina Nehwal aser HS Prannoy na Bangkok tonga aoba sülen Covid-19 tashidak tendangba tasembubana nung tashidak keta aliba potetogo.

Saina asayamung nungi tugatokogo aser kasa mapang nung la kinungbo Parupalli Kashyap dena asayamung nung shilem magitetsüsa kümogo.

Kashyap Mongolbarnü Canada nunger asayar Jason Anthony Ho-Shue den asayatsü liasü.

Kashyap mozükidangi tashidak tendangtsü atema anirogo, kechiyong pa Saina den külemi liasü. Pa dak tashidak tendangba osang atadar aser asayamung ayongertemi pa daka tashidak keta alitsü ta temulung melemi bilemer.

Osangtem ajak kakat nung masü saka tepang agi dang metetdaktsüogo aser India team tang report atadar. Thailand temzüng ozüng kübok Saina aser Prannoy na mozükidangi

anogo 10 temang anepalutsüsa akümstü.

Prannoy tang agi tasembubana tashidak tendangba mapang tashidak keta aliba jangjaogo.

Ajisüaka item asayatem dak alaka India squad nung tanungba asayatem asayamung nung shilem agitsü temelaba agitsüogo.

Tang agi tanabenbuba Saina aser Prannoy na dak tashidak potetogo. Taoba ita Kashyap den külemi tenaprongla dak Gurusaidutt indang kiyimba benjung nung adenba sülen tashidak potet. Parnok asemprongla quarantine nung aliba sülen Bangkok-i maru tsüngda negative tendangteta liasü. Bangkok tonga aoba sülena tashidak keta aliba mepotet.

Tiaka Prannoy Bangkok nung takdang ka nung pa kija anenzüker liasü aser tang tashi nung tanga asayar ka dak danga tashidak keta mali.

Warner-i Siraj aser India team dang tatok meshi



Aenjeti/January 12, 2021 (Agencies): Australia nunger asayar David Warner-i Bodhbarnü, tasembuba Test asayaba mapang India nunger asayatem aser talisa pacer Mohammed Siraj dang o tamajung shia mezüngmeshiba aitsüogo aser ashiba agi, asaya reprangertemi iba amala yimya beshiba ya khenyongi agizüktsü makok.

Siraj tang mezüngbuba Australia nung asayaba mapang pa den külem asayar Jasprit Bumrah na anogo ana atonga asaya reprangertemi mezüngmeshia liasü.

India nunger asayatem umpire tem dang ken o ashishiba sülen asaya mapa tatsüka atema anena ata aser iba sülen asaya repranger trok mintok aser Cricket Australia-i tatok meshia liasü.

"N i @mohammedsirajofficial aser India team dak tatok meshir, kechiyong racism aser mezüngmeshi ya khenyongi magizüktsü aser ni linük nung asaya reprangertem dang nungi iba dang nungi yimya tajungba

beshitsü imlar," ta Warner-i Instagram ajanga lemsatet.

Australia nunger asayatem pusemogo aser iba tatalokba sülen captain Tim Paine India team adenshir aliba nung oa shilem agiogo.

India team captain Ajinkya Rahane-ia, iba mezüngmeshi ajanga parnok kanga yiruogo, ta ashi.

Asaya indang jembidang Warner-i, yirur asaya ana tashi nung masayatetba sülen tanaben asayatsü maongka anguba atema kanga pelar, ta ashi.

"Park nung tanaben asayatetba atema kanga pelar. Onoki imlaba ama asaya metembang saka ibaji Test asaya yimya lir. Anogo pong tashi kanga toktepa asayaogo aser külem asayatem kanga meranga asayago.

"Draw asütsüsa asayatetba atema India team nem tenüngsang agitsür. Asaya takoker bendangtsü atema Brisbane-i aotsü aser Gabba ya asayatsü tesem tajung ka lir," ta pai ashi.

BILEMDANGANG

"Shisabulu khuretem ajak ya meimchir sobutsü lir."